

長者懊惱三處經

後漢三藏法師安世高譯

聞如是一時佛在舍衛國祇樹給孤獨精舍與大比丘衆千二百五十人俱爾時舍衛城有大長者財富無數田宅牛馬不可稱計家無親子其國俗法若無子者壽終之後財没入官長者夫婦禱祀諸天日月星辰求索子息豎立門戶亦不能得時長者婦歸命三寶奉受五戒晨夜精進不敢懈怠便得懷軀婦人黠者有五事應一者知夫壻意二者知夫

壻念不念三者知所因懷軀四者別知男女五者別善惡是長者婦報長者言我已懷軀長者歡喜日日供養衣被飯食極使精細十月已滿便生得男五乳母共供養子乳者哺者洗浴者衣被者抱持者兒即長大年十五六長者夫婦爲子索婦得長者女端正姝好於城外園館大請人客飯食娛樂餽饌精細四方來者無所拒逆如是賓客至于七日時兒夫婦遊行園中有樹名曰無憂其上有華色甚鮮好如若緋色婦語夫言欲得此華夫

便上樹爲取此華樹枝細小即時摧折兒便  
墮地斷絕而死父母聞之知墮樹死便走奔  
趣母抱其頭父抱其脚摩挲瞻視永絕不甦  
父母悲哀五內摧傷衆客見之亦代哀痛死  
何急疾衆客飲食娛樂未畢而反墮樹死亡  
無常時佛世尊與阿難俱著衣持鉢入城分  
衛見長者夫婦獨有一子而墮樹死啼哭悲  
傷甚不可言佛見此兒所從來生從忉利天  
壽命終盡過生於長者家死即生龍中金翅  
鳥王復取食之三處悲哀悉共發喪佛告阿

難詣長者所解喻其意爲除其患設不爾者  
恐愁憂死阿難言唯然即從佛行到長者所  
長者聞佛來到其所心即歡喜稽首佛足佛  
問長者何爲愁憂乃如是乎長者白佛我身  
無相因有一子爲其娶婦請客飲食娛樂未  
畢上樹取華墮地便死我身如石心如剛鐵  
適得一子而捨我死佛告長者人生有死物  
成有敗對至命盡不可避藏捐去愛念勿復  
憂感時佛出光明徧照十方使長者見天上  
龍中父母啼哭佛語長者此兒本從忉利天

敬七

十一

上壽盡命終來生卿家壽盡便生龍中金翅  
鳥王即取嗽之三處一時共啼哭爲是誰子  
佛即說偈言

天上諸天子 爲是卿子乎 爲在諸龍中  
龍神之子耶 時佛自解言 非是諸天子

亦非爲卿子 復非諸龍子 生死諸因緣

無常譬如幻 一切不久立 譬若如過客

佛語長者死不可得離去事不追長者白佛  
言此兒宿命罪福云何生豪富家其命早夭  
此爲何應佛言此兒前世好喜布施尊敬於

人緣此福德生豪富家喜射獵戲傷害群生  
用是之故令身命短罪福隨人如影隨形長  
者聞是及一切衆皆有慈心發大道意應時  
踊躍逮得法忍佛說如是長者夫婦一切衆  
會皆歡喜受

長者懊惱三處經